

Salman Ismet - Šerbo, geometar



Dvanaestog novembra 2014. godine nakon kraće bolesti na drugi svijet je preselio kolega Salman Ismet zvan Šerbo. Čitava Lašvanska dolina poznavala je ovog vrsnog geodetskog stručnjaka po nadimku Šerbo, a dobio ga je po čuvenom harmonikašu Ismetu Alajbegoviću Šerbi, jer je uvijek radeći "pjevušio".

Naš rahmetli Šerbo, Salman Ismet, rođen je 14.11.1937. godine u selu Žabica, opština Ljubinja. Osnovnu školu je završio u Ljubinju, a Geodetsku tehničku školu u Sarajevu 1957. godine.

Po završetku srednje škole, kao mladi geometar, pripravnik zapošljava se u Općini Travnik. Međutim, ogroman nedostatak geodetskog kadra u Srednjoj Bosni dolazi do

izražaja, pa Šerbo, pored općine Travnik radi kao geometar i u općinama Busovača i Vitez, a kasnije i Novi Travnik.

Iako od mladosti narušenog zdravlja (rano je ostao sa jednim bubregom) dugogodišnji je terenski radnik na poslovima inženjerske geodezije, te vještak u upravnim postupcima imovinsko-pravne službe općina Travnik, Novi Travnik, Vitez i Busovača, ali i kao sudski vještak iz oblasti katastra pri Općinskom sudu u Travniku.

Penzionisan je 1991. godine sa još nekolicinom kolega iz katastarskog ureda općine Travnik. Iako je bio penzioner, zbog nedostatka geodetskog kadra, poslove vještačenja iz oblasti katastra obavljao je pri Općinskom sudu Travnik sve dok se nije počeo boriti sa bolešću.

Porodični život proveo je sa suprugom Anicom i kćerkom Isabelom, koju je ratni vihor odveo do daleke Australije.

Smrću našeg kolege Šerbe, izgubili smo čestitog čovjeka, izgubili smo kolegu uvijek spremnog za pomoć drugima i naravno, prenijeti svoje veliko znanje o gruntovnici i katastru na mlađe geodetske naraštaje. Geodetska struka je izgubila vrsnog stručnjaka, koji je zračio otvorenošću i spremnošću za rješavanje i najkomplikovanijeg katastarskog predmeta.

Našem Šerbi je dženaza obavljena 13.11.2014. godine na mezarju Kupilo-Bašbunar u Travniku. Ispraćen je od porodice, kolega i sugrađana.

Neka je rahmet našem Šerbi ...

Vekas Njegović